

四庫全書

集部

欽定四庫全書

集部

閩風集卷二

詳校官庶吉士 臣張溥

主事 臣呂雲棟覆勘

謄錄貢生 臣劉錫珪

謄錄監生 臣黃維

欽定四庫全書

集部四

提要

閻風集十二卷

別集類三 宋

臣等謹案閻風集十二卷宋舒岳祥撰岳祥

字舜侯寧海人寶祐四年進士官奉化尉終

承直郎宋亡不仕教授鄉里以終兩浙名賢

錄載所著有史述漢砭補史家錄蓀墅稿避

地稿篆畦稿蝶軒稿梧竹里稿三史纂言談

纂纂續纂殘纂傳纂肆昔遊錄深衣圖說凡
二百二十卷今諸書多佚不見焦竑國史經
籍志載岳祥閨風集二十卷世亦無傳檢永
樂大典中所載岳祥詩文間題篆畦蝶軒蓀
墅諸集名而題為閨風集者居十之八九似
當時諸稿本分帙編次而閨風集乃其總名
今原書卷第已為永樂大典所亂無可辨別
謹依類哀緝釐為詩九卷雜文三卷仍其總

名以閬風集名之又集中有百一老詩序蓋
即所賦老漁老獵之類似原本亦別有一集
然所闕已多不成卷帙故亦不分析焉岳祥
少時以文見吳子良即稱其異秉靈識如漢
終賈晚逢鼎革遯跡終身乃益覃思于著作
其詩文類皆稱臆而談不事彫績集中有詩
訣一首云欲自柳州參靖節將邀東野適盧
仝又云平原駿馬開黃霧下水輕舟遇快風

其宗旨所在可以想見矣乾隆四十六年九月恭校上

總纂官臣紀昀臣陸錫熊臣孫士毅

總校官臣陸費墀

原序

舒先生既捐館舍之十年遺書有夢蝶軒豪篆畦詩已
鋟梓行世獨號閭風集者最為大全板本既裁於兵子叔
獻將復刊之家窶甚力不能任且以三百年來諸公詩
文論之梅聖俞宛陵蘇子美吳中歐陽永叔廬陵蘇明
允父子成都建安九江王介甫臨川曾子固盱江陳同
父婺郡葉正則海陵豈其家子弟為之哉古儒先生也
門人父子傳其書轉相教授及後來摹印簡便之說

原闕

則鄉黨朋從與異世慕用之士相與出資貨以給費閭
風集是三人者盡將刊之先生負奇氣固伯仲諸葛孔
明王景略其視齷齪瑣碎雖達官貴人若遺涕唾不肯
一回顧少年已擢巍科同時流輩往往涉足要津已獨
凝立却行不能以分寸為進其文凌張文潛秦太虛而
出其上其詩韓子蒼陸務觀不足高也至大四年龍集
辛亥三月永康胡長孺序之於海上仙源觀

讀虞書賡歌可以見詩之雅正讀夏書五子之歌可以

見詩之變風變雅世道之隆汙不同而詩之正變亦異然天典民彝之正萬古一心也士生斯世豈不欲以和平之聲鳴國家之盛時不虞氏也遇合不舉陶也於是離騷興焉俛詩作焉曰指九天以為正曰弟子勉學天不忘也不求人知而求天知一心之唐虞豈與世變俱化哉此陶靖節杜少陵所以卓然為詩人冠冕而謝靈運王維之流不足數也論詩者觀其大節而已余少時已聞舒景薛言語妙天下景薛更字舜侯擢丙辰第與

余弟仲儀為同年進士然自重難進閱羣飛之刺天而無競心不得弦歌生民清廟之章薦之郊廟又不得紬金匱石室書續左馬班氏之筆晚歲涉坎險歷蹇難萍流蓬轉有陶杜所未嘗氣益勁思益深胸中之書不燼方寸之廣居浩乎其獨存弄雲月於嵒巖之下友漁樵於寂寞之濱固窮守道皜皜乎白璧之全其文如泉出山達乎大川而放諸海有本者如是何謂本大節之特立也余與舜侯別二十餘年時得見其詩文一日書來

以辟地篆畦蝶軒三藁惠教讀之如朱弦疏越之音一
唱三歎年進而學日進學進而文日進述酒之微婉同
谷之悲壯友陶杜於千載德業之進亦未艾也三史纂
言考訂精確惜不令作宋一經以垂無窮嘗以晚易名
齋探索三陳九卦之蘊以處憂患顛沛流離不能詘其
志阨窮顛顛不能更其守在賁之初九舍車而徒此賁
之所以為文豈槩人墨客所能識哉舜侯贈余詩曰從
來明月無今古此坡老所云浮雲世事改孤月此心明

余不足以當之而教我之意厚矣凡百君子各敬爾身
蓋朋友相勉之詩也願相與切磋焉梅蒙協洽歲圉陽
月既望浚儀遺民王應麟序

閩風集原序考證

第一頁前六行 案建安九江四字上下當有脫文又
下文是三人者句文義亦未明疑有誤

欽定四庫全書

閨風集卷一

宋 舒岳祥 撰

四言詩

雨後月明起坐戲成

雨後月明如醉而醒不見其形但見其影我夢初回非
曙非暝道人無言起舞弄景水鳥無聲一鶴自警清風
南來露墜炯炯我病不飲酌此清冷超然頓悟九萬俄
頃

伯夷

士如圭璋自然廉隅一日無恥不可以居上帝降衷毀敗是虞遷史作傳爰首餓夫

管鮑

為管則易為鮑則難相馬失瘦相士失寒管貧鮑富坦然相安于利不疚于義斯完

魯二儒

叔孫事秦以諛蔽愚至於歸漢薦進狡夫滅我王道甚

於焚書是以二儒確乎其居

停雲詩

并序

劉正仲和淵明停雲以貺予此詩予昔嘗和之以貽景韓泳道者也二子不可復作矣撫卷悵然復和之以荅正仲四海衣冠遭時艱虞至於暴骨原草者多矣予與正仲偷生巖谷稍尋筆墨倡酬以見志斯又不幸之幸歟我懷同人如曠望雨天地崩裂干戈間阻陳編孤哦槁

梧自撫思而不見援桂延佇

千山月白露氣濛濛四顧懍懍素靄成江飛蘿掃屋懸
泉挂窻之子不至世孰吾從

小園宛宛水木鮮榮子念及此我寧忘情曩歲中都我
歸子征以子出處用觀我生

俯仰換世昨夢蟻柯故交零落屈指無多孔時尹任夷
清惠和各言爾志夫也如何

五言古詩

寓言

妾家有高樓高高入青天欲作萬丈梯倚空無攀援良
人在萬里一去幾經年長路與天接舉足躡星躔妾欲
尋夫壻解甲投戈鋌攜手上雲霓真到天河壩牽牛與
織女不知妾相憐姮娥惠神藥燕婉成天仙

昔有貴公子聞鶴九臯禽其先本胎化棲止必瑤林遣
使三往聘致之千黃金清唳復善舞節奏合瑤琴日給
費魚米延之如玳簪銜杯為主壽千歲無遐心有客為

主謀禽荒可傾國此物非潔清其志本貪冒遺矢玉階
陰吞腥金塘側當以禽養禽毋令食人食主人領其言
從此成捐斥蕭條風雨晨蹭蹬霜雪夕鶴將辭王去顧
視亦悽惻謂客君少留行當蹈吾迹客亦慘不樂相看
淚霑臆

十蟲吟并序

予舊讀盧柳南詩因作黑蜘蛛葫蘆摘二首
跋其後觀者絕倒今曹季辯示予詩一編名

山中性情其中有詭異似柳南者至于奇不失正則幾于元次山孟東野矣不止柳南也為作十蟲吟以擬之觀者又當絕倒也

蟲有促織兒憂人不憂已華身有龍鸞不出工女指瓦礫為堂與青莎作衣被一身可自了刺刺不能已白露夜庭空淒其行去矣金屋白玉床貴人呼不起

蟲有織絹娘軋軋鳴窻紙山翁卧中間謂是機上婢瓠花日蕭疎豆葉行披靡青燈照夜闌胡為苦如此

蟲有絡緯婆如縲復如紡豆籬秋雨餘秉燭不須網置之銀絲籠因而入羅幌偏資兒女玩終夜奏繁響

蟲有搗米叔善跳如蝥穀偶與屋上塵墮地豈好觸兒童仰置之反弓奮腰腹欲行復遭抑屢作不能伏非汝懶於蝥其力有不足

蟲有賣油公什伍處陰濕長脚如蠡蛸脰細走不及兒童反接之邀其吐微汁所挾雖不多坐此遭攬拾傾資僅有此微生何以給

蟲有避債夫緝蠶枝間綴竊食檉松毛負之以為蓋首
鼠開兩端見人深拒閉想汝作債初已作逃匿計小兒
不汝赦推尋見根柢計窮挺身走終日失其竈

蟲有轉丸蜣雙角牛怒張生子牛矢中轉圜技所長兩
兩如推車千百滿路旁彈丸有不若累累圓且光汙穢
不自羞敢比蘇合香惜哉爾之智不善擇其良

蟲有蛀地牛曲叻利如鈎趨取尾作首倒行腹為頭燥
土作陷沙露喙伺其幽小蟲誤過之一入出無由小兒

嫉其然取彼衆中酋縛置它穴口其類亦相仇一引兩
得之盡置清溪流

蟲有攢梭子頭腹俱銳長綠衣而絳裏飛躍低跟踟名
我固甚善所愧無筐箱維天有南箕不可以簸揚微蟲
人強名此豈彼竊攘秋田蚱蜢橫暗野如飛蝗索索淺
草中不倚兩股強類中最善類霜露死其常

蟲有蠹書魚白膩鉛粉如岐尾細而長所嗜惟食書我
老書久廢兒曹復相踈經年不啟櫝宜爾穴以居蝕紙

魚齧字古篆成紆餘腹中有經傳顧我何空虛

續十蟲吟

蟲有搏蠅虎似螭無網罟羣蠅爭噉時潛身入其聚蠅
初玩其小突然能攫取生擒加面縛不辨頭翅股蠅為
人所憎同欲畀茲虎其奈彼實繁日食能幾許

蟲有白蟻虎食蟻功有取大厦初落成白蟻邪其礎日
繁實有徒歲久仆梁栢聞爾能食之往求數十許縱之
穴竅中種育成生聚食蟻既無餘虎自緣庭戶亦復生

几按往往入筐筥主人反厭憎擁篲務屏去客謂主勿
然前勞宜論叙

蟲有齧桑羊兩鉗如角怒玄甲類蛄蜺亦如龜背負我
有十畝桑苦為渠所蠹食必食其心樹死又飛去不知
從何來鑽鑿不到處上下開兩牕隱匿巧多路嗟哉啄
木鳥剛吐柔不茹

蟲有齧菊羊齧腦腦則死人謂食且盡細察理不爾微
軀細於蠅玄甲而利嘴頂上一粟紅鮮明大如蟻方當

四五月苗盛新怒起上下截其莖於中寄生子腦瘁子乃成分枝從此始種菊須摘腦不摘分披靡理有損而益未用分愠喜

蟲有土中狗翼短身則長行地如狗子兩臂健擘張縱橫成穴道掘堞身蔽藏握之人手中排挾力甚強夜飛能打人有物憑為殃收之入藥錄蚩蛭同其良君看醫師術可謂宰相方

蟲有水走馬八脚成四蹄映日如藻葉點點水中開得

食時爭噉忽然各東西天牛非鰈水馬非駃騠形容
貴其似甕舞為醯鷄

蟲有天水牛兩臂徒甚修長尾龜其類玄背鰲與儔細
評無甚似大槩勿深求終身混沮洳亦與蝦蛭游或云能
羽化為蟬槐樹頭清高乃如許亦足掩前羞

蟲有蚪蚪子初化厠羣魚鰕鰕穿綠藻洋洋泳深蒲俄
然生臂股去尾登泥塗回首謂羣魚幸來相就居神鯉
為魚長不肯受辱汙荅云我龍種豈與爾為徒

蟲有報雨蛙竹樹能攀援青褐隨所處膚如凝脂鮮長
頸而方頷碩盼升高顛久晴初得雨清聲滿林園紅蕉
映白日碧葦覆清泉幽居樂清淨飲露如風蟬俯視蝦
蟆輩迥然異凡仙能鳴復善晦所貴身名全

蟲有搖櫓卽楚楚綠衣裳怒目祇自躁奮臂倚枝長附
桑寄蟬蛸亦入秘術方折之插屋壁經時子穰穰竹籬
疎復密牽牛花低昂迎風新意氣顧盼何昂藏如逢大
車轍毅然亦敢當不如捕鳴蟬脆美不爾傷

十二月二十七日病起行花下聞春禽有感

昨日立春節今晨春鳥鳴前峯宿蒼靄風聲和且平南
翁病來久起繞花枝行花枝向人笑婉孌感幽情摩挲
勗小男何時看汝成童稚引我前老至不覺驚艱難亦
已極須汝見休明望望替官役不顧日月征

放言

寒暑一大瘡天地一病軀古來幾寒暑元氣腴削餘人
物生其中短小一侏儒神農乏藥草黃帝無醫書坐令

豺虎橫咬嚼為膏腴頑疾久不治臟腑生蟲蛆願借大
雷斧礫此害物徒八荒既清廓萬古無憂虞

題王德淵水西藁

子有婉微句藏之平淡間想子無愠色熙熙好容顏古
人罕暴戾詳緩心自閒吾知子用意欲挽陶韋還欲以
靜息競欲以柔鎬頑坐使聽者心悠然和且安子來索
我語我與子無言評茶及品水此事在舌端還有分別
否歸鴻沒遠天

稻花桑花

稻花花中王桑花花中后餘花皆嬪妃以色媚左右稻
花吹早香風露千萬畝上以奉玉食粢盛及醴酒下以
飽蒼生億兆舖其口桑花雖無華紅甚映纖手皇后首
親蠶六宮承傳姆天生衆裸蟲無羽毛飛走匪此皆凍
死性命安得有予謂二花者斯民之父母昔予賦麥花
適當來牟候未及歌二花三花誰可後請續時夏詩以
為風化首

春日新浴

白髮美青陽新年試新浴小窻潔而明板閣密以燠簾
垂風絕蹊湯煖雲升屋探手酌溫涼微微澆背腹上盆
潄吾面下盆濯吾足初如馬釋鞿漸覺蟬蛻殼周浹更
融怡味如書熟讀澡身當去塵洗心當脫俗湛然清淨
源不遣生惡濁振衣聊出門篝煙度修竹

七月十七日夜翫月

遲月呼不出海氣紅碧噓何人捧脩壁上處青松疎松

間著不得飛徹萬里衢散作千山雪蘆花搖江湖冰輪
雖漸側老桂斫不枯清光已非昨來日更可吁徘徊情
所結有酒且歌呼

借居喜杉棚成

夏炎已云極秋暑方自茲借居面西日午後如烹炊主
人愛敬客架杉覆青枝赫日辟三舍鮮飈汎淪漪高蟬
亦好吟振響流笙簫夜靜明月出疎影復陸離歆枕寢
桃竹露坐冠筍皮凡此暑中事施之無不宜念我逃世

難過用恐禍隨昔時半山老畏熱架條枚不知公相貴
清儉諒可思我本無家客祿盡壽有遺得此已厚忝銜
感以成詩

贈醫博士范心齋

疾病之所生風寒燥濕毒浸淫侵臟腑脉絡起絲粟有
藥所不攻鍼砭功始錄有如龍潛見巖穴通隱伏又如
善用兵洞窟皆驅逐毛皮與腠理一二數可燭刺俞已
及髓投穴不中肉春回九地底冰崖芽衆綠范子故書

生於此見也獨十年從良師神祕卷篋讀我疑秦盧扁
垣墻能外矚又疑華佗子披臟先剖腹范生何大奇方
書可無讀我老目已昏煩君為濯滌更閱十年書細字
蠅頭黑與子作佳傳當與太史續

幽疥

性不耐喧聒况遭疥癢牽此物有朋黨一搔千竅連幽
陰及肘股爛漫羅脅肩城狐及社鼠不如汝穴堅蟻蝨
猶外患爾獨腠理穿百藥既不醒取說聊自完閑邪自

檢束斂容如見賢彼亦畏天理亦有負其頑既不廢談
笑亦不妨食眠萬事貴隱忍此方老子傳

將別崇谿遺仲素李厚昆仲

新交勝舊交生別猶死別饑魂散欲飛愁腸鬱以結去
住誠兩難主客新握別家山杳何許千丈高截薛試登
黃甘望百里見積雪我甌無儲粟我篋無重褐妻孥幸
團藥忘此饑與渴倚君為大廈顧我顏色悅無家未易
歸無產難久歇鄉校著我名免在編氓列麥田望有秋

桑葉行可掇貫貨延餘年空囊誰負竊不敢久累君去
去春二月為我謝王戴徽音無斷絕

食蓮有感戲為古興新體

青蘋先知秋調遣入窻几荷花如六郎一笑忽墮水美
人坐生愁攬衣中夜起繁華難久持零落自茲始所思
在遠道千里復萬里何處無芙蓉秋江總相似折取蓮
蓬看蜜房綴蜂子青蠅初脫衣瑤軫中含髓食蓮須食
心心中苦如此

冠攘之餘穀五斗才易一鷄衰老多病資血味
以為養求之弗可得畜二母鷄自春抱育至夏
百翼不減子美生理喜而有作

四月初十日

昔有尸鄉翁養鷄蓋阡陌累財千餘萬積微利自博子
美居瀼西此物尚百駟作詩戒宗文墻東樹籠柵我今
山居中生理苦迫窄哀年資食治時有不速客海魚不
常儲溪蟹碎難擘頗欲效兩翁字鷄供口食買得雙伏
雌領以一赤幘戶外聽約束安能汙案席剖圻五十卵

引哺漸開拆從茲日生向秋益繁息麥雲行刈黃可
得二十石已知餅臠具不假天邊翼竊笑茅季偉割烹
惟一隻奉親不及賓賓生拙無策

古思二首

耿耿不可忍相思在東北花月以為姿風露以為食取
我虞氏琴一彈三歎息泠然不可尋變為湘江瑟湘江
深復深哀哀淚千尺

饑餓未必死甘腴能殺人憔悴未必殞逸樂能喪身所

以巖谷槁以儉全其真秉耒自耕野腰斧躬採薪亦復
誦書史自負亨經綸兵寇幸無恙委蛇保天民

矚物

灼灼日及華朝榮夕已墜牽牛泣碧露見現歛憔悴拒
霜舒曉紅惟愁夕陰至蜻蛚庇其根亦復多愁思容色
豈不佳浮脆何足貴念此令人嗟百年何流駛所以靖
節翁把菊有深意

過字韻詩辱諸友聯和方營度枯鄙以酬厚意

偶報北兵自甌閩回驅男女牛羊萬計入蛟湖
深暖出獨山屯尚義由童公嶺以北三日夜不
休聞之驚心遂成閣筆是月十四夜對月感涕
遂即前韻以紀時事奉呈諸友

麥倒桑折枝山外花門過牛亡主不歸婦去蠶未卧在
者哭空村吞聲誰敢大盲暉隱空崖驚塵飛暗堦川逝
痛陵遷春深悲國破可惜此良宵月輪升紫磨

荆公詩
紫磨月

輪升
塞外

十六夜月色佳甚對酒效樂天體招酒伴賞月
八月十六夜清涼明月天新酒雖未熟陳酒喜未乾早
稻有餘飯輕衫未為寒傍人見我醉胷中故朗然有詩
不自作但詠古人篇喚取故山甫醉即對牀眠

九月十四日夜枕不寐起視明月清寒著人冷
然有欲仙之意

筍冠枕清冷胡床坐空闊鮮飈飛早霜活水養明月神
遊十丈蓮仰卧恣天閱挽取河東流黑我頭上雪泥丸

吐神光陟降在金闕湛然大圓鏡一悟萬想滅

十一日夜雲月點綴山氣如海羈雌暗嗶條忽
東西因誦王摩詰云夜登華子岡輞水淪漣與
月上下寒山遠火明滅林外深巷寒犬吠聲如
豹村墟夜舂復與疎鐘相間往往摩詰詩多描
摸此境界余更掇拾遺餘耳

孤舂出苦蓋遠火翳層磯雲月光泚泚露葉淨輝輝此
時正寂默沙禽鳴且飛

琴旨

重露洗叢菊長宇流哀鴻瞽月入九地啞木號太空老
翁中夜起清坐尋絲桐兩片乾死木和合藏深衷七絃
說妙義十指揚春風自古知音者舜文周孔公四聖洗
憂患琴與易道通舜處囂傲厄文居君臣窮二叔流讒言
陳蔡靡所容物外有變逆聖道當正中感此悟琴旨瞭
然古人胸置琴且勿彈待我讀易終

送達善歸玉塘

霜降水泉涸風緊草木枯柴扃常自閉淡泊守園廬晨
有客來訪裹飯如桑輿世事不欲論幽懷詠唐虞蚩尤
作五兵軒轅力誅除戰伐從此始禍患引八區茲事傷
我心何由返古初我輩惜榆景來往莫相疎

古意

客從南方來遺我薰風琴薰風未易致且奏易水吟高
浪忽起立四顧變愁陰征馬立踟躕旁人淚沾襟壯士
不畏死怒髮豎森森長揖辭四坐秦關無阻深燕客視

秦王已若置中禽一朝事不成易水有悲音請君且勿彈此曲傷人心

十二月初六日龜藏夜坐有感

厲厲歲于邁栗栗風向邁老驥倦長坡卧樵如罷牛時一長吁慚與螻蟻儔高鴻志萬里矰繳非所憂胡差苦哀鳴失類中道休壯士今則已偃仰搔白頭讀書古分限眼暗志未酬轉蓬從風起直上晴空遊流星下至地化石空山幽升沉亦何常念此涕淚流

子瞻在惠州以十月初吉作重九和淵明已酉
九月九日韻余去年以此日奔避萬山今日則
有間矣有野人饋菊兩叢對之歎息因繼韻陶
蘇之後

去年十月吉四山戎馬交携家走萬壑惟恐草莽凋今
日復此日回睇龍舒高青黃雜遠樹丹碧暖微霄黃華
一斗酒慰此兩足勞念茲一釜內觸之成爛焦我窮天
所憐杯水解鬱陶冥心聽回斡聊以永今朝

十月三十日晴暖而梅意殊冷也

良月今日盡始見小春天明日為子正陽復於此馬塢
陰委宿莽已覺青娟壞壁出凍蠅亦解飛翾翾向來
可憎物今者更堪憐梅梢太瘦生此意正渺綿窺園頻
挾策粒吐紅豆鮮正須待一雪我豈資暄妍

次韻袁伯長寄贈之作

維時十月閏收穫已登場朋舊喜我至殷勤置壺觴問
我何方來憂墨見清揚答言辱君問欲報不成章憶昔

盜起初堅冰由履霜妖民縱愚妄敢凌太陽光賤子久
客鄆移家入新昌完璞保貞吉訓猷謀善臧嶽嶇遠荆
棘瘠痛辟鋒鏑五男不挾冊四婦廢條桑長孫病風攣
二孫鶴未昂三孫始周晬瘍垢浴蘭湯曾孫客中產敢
擬門戶當復有四女孫包裹針線裝步涉青店谿伏莽
突長槍性命幸完免翁媪扶筇將回首煙焰漲搜山發
窖藏家林付瓦礫書籍罹咎殃賁糧中道絕萬事慨以
慷墳塋失灑掃祖禰廢蒸嘗凜西非吾里浣花無草堂

猛獸難與羣我亦思還鄉又聞來屠剡玉石恐俱傷冒
暑去雪村故里隔一岡崇溪吾故茆父老不相忘昔行
梅未落今憇梅再芳皇皇一年餘兒孫幸成行破屋涉
寒暑舊隱渺相望越公之賢孫訪我欲具航老我已
短公孫意何長悲歌寄贈什歌罷復徊徨

次達善送趙君理韻因寄畬齋陳貴白

杉棚已絕筆復得雲錦書况當既望後一鏡懸空虛恍
然玉堂上乘鶴來須臾君健勝我健我臞甚君臞人事

有離合尺牘莫相疎老驥不忘騁老耕不忘畬筆硯易
乾澀時時要煦濡井汲去泥鮒清冽用有餘自君之往
矣我懷久不舒久聞金齋君挿架富名都欲往鵷鵠市
讀書借其居我曾見其文鼎鑒出帥初何年激齋老道
我問其途

客好

薄田歲罕收柴門客多好車轍自成趣蒿萊不須掃鄰
家知客到亦復饋梨棗酒盡當復沽言論自顛倒萬事

皆可談慎勿談世道

巖間宴坐

蛩泣草根露鶴鳴松頂風標格既有異音韻那能同我
家水石村圓月出中峯樵子時往還野客多仙蹤杳杳
林表磬冥冥巖下鐘霧重時作雨衣翠濕重重孔竅明
似藕肌骨通玲瓏巖花時嗅馥掩冉紛青紅萬葉互戛
擊琴瑟間笙鏞我當大悶時一嘯來清風鳳鳴相應和
龍吟諧律筒竅竹去其節清響合商宮累黍以為律旋

金匱要略卷一
變為無窮仙人授刀尺度數合纖洪此訣留巖石千古
蒼苔封

村莊麥飯蘿筍有懷達善正仲帥初因寄袁仲
素季厚陳用之

麥風生曉寒梅潦蘊炎溽三日不出門新筍已成竹獨
酌固自佳對婦亦不俗黃魚出海門饜飫及僮僕因思
去年時煎牟作糜粥饑餓走荒山羣奴深兩目今春幸
完生一飽萬事足薄蠶微有收條桑柔更綠百里無鷄

豚雖老不食肉本是在家僧殺生豈吾欲頗恨在崇谿
芻豢事屠戮歸來賣筍翁燒煮擬果腹無奈軍馬囂十
百遭縛束此君何不幸乃值汝輩辱今辰斑衣郎扣門
求采錄開奩聚纖指解苞剥寒玉釋縛李左車拭面何
平叔有此席上珍舉筯誠不惡風味近瑤柱標格薦醕
醪似憐老翁饒洗我塵一斛蛻脫成癯仙凌空駕黃鵠
吐吭出新詩落紙歌醉墨王劉戴三君秦楚齊敵國樂
縣森筍簾箭鋒值正鵠安得長相從大嚼貧簞谷二袁

竹主人森森散林麓我來不問主竟造藏書屋主人不
我苛終歲取書讀陳郎後來秀長瘦帶巖壑挾冊從我
遊牛腰許成軸

雨餘草樹間羽蟲亂鳴山齋晚酌朋輩已散聽之
不減孔稚圭兩部鼓吹也既醉而卧卧而覺家
人尚明燈事績說向來鼻鼾雷鳴兩山皆撼也
戲作示之

秋蟲不用喙動羽哀更清夜長不肯默我眠渠自鳴我

則異於是鼻息為雷聲止作不以力太音自天成鼻吼
耳不知此樂尤難名

七月二日戲為紈扇新體

美人弄紈扇常恨無秋風待得秋風至棄置在篋中棄
置不自惜物理有終窮反恐美人寵隨手亦成空十五
邯鄲女玉指弄絲桐秀慧解歌舞艷彩敵芙蓉一朝登
上國飛聲凌後宮此日邢夫人正自難為容紈扇手所
題主惠余其終

日食

十月初吉日四野聞驚呼停杯出門看日食將無餘有
如黑漆盤來掩白玉盃自午而及申磨盪未還初父老
涕泗語便恐天眼枯前年六月吉晝日如煤塗衆星爭
光怪淡月懸天衢已謂畢生世不復覩赤烏須臾還舊
觀田野頓昭蘇今胡久淪厄翳昧不可祛前時縉紳謂
占度不屬吳分野受其咎天道安可誣以日譖敵國不
君良可吁茲辰為誰食無路攄臣愚太陽萬萬古少待

收桑榆

丙子兵禍自有宇宙寧海所未見也予家二百
指甌石將罄避地入剡貸粟而食解衣償之不
敢以淵明之主人望於人也因讀淵明乞食詩
和韻書懷呈達善亦見達善燒痕藁中有陶公
乞食顏公乞米二帖跋尾也

淵明不可及適意惟所之無食不免乞折腰乃竟辭主
人必義士知心如子期厚饋既調急復酌我以卮談諧

有真味斯人定能詩柳惠未失正魯男豈可非學陶何
必乞書此以自貽

次韻酬達善

昔有好名者舉國讓子之若或非其人簞食見色辭草
木固同臭磁鐵非有期主人解談諧寓言蒙莊卮陶公
豈真乞善謔淇澳詩仲尼不假蓋將護子夏非賢哉此
賓主不乞彼自貽

促織歎

刺刺重刺刺唧唧復唧唧只解促鬢絲豈能催婦織織
亦何用催有絲願成匹今夏蠶薄收巧手閑刀尺昨下
急急符三日立稅籍篋中無餘絲紅女淚雙滴汝更催
不休使我不得息汝因貪與嗔形化生股翼不特登我
門又入牀下壁號我夜不眠墜戶無計塞何時清霜來
掘堦同一寂

十月五日風

十月五日風俗占端可驗常年誰能記兩歲入程槩去

年當此月初三月未艷暮下陳村莊夜投象原店道邊
人未眠山曲燈微閃時經兵火餘驚問暗窺覘往扣瓜
葛門炊糜聊屬厭仲叔為猪肝不辭口腹玷回思萬馬
驚心掉舌為膽恐恐如有追味夾踏霜霰橫山過西田
惡風吹欲飮蕭蕭三兩家逋流已先占憐我是官人枯
薪許分樛時難無沽戶匱糲得充歟我行僕忙追趙坑
石排劍荒蹊陟崇岡奔湍嚙深塹有塢當中心紙鄉家
自贍主人褐寬博黃泥補茨苦邀我勸我留鋪床展伸

欠少婦亦解事爐中添燄燄我意自多危岌岌急風纜
蓐食入雪樓山深路猶閣氷柱照層厓霜花滑斷砌山
家喜客來開門容弛擔翁媪互行酌畦菜許分鹽此日
氣頗舒愁新懽得暫文叔因饑寒豆粥懷一啗勞薪與
鍊炭至此成鍼砭頗怪少陵妻粉黛未忘豔今辰復此
日山菴私酒釀掃林三日風紙簾垂襜褕患難幾人全
生存吾已忝十月五日風艱難須在念

陰雨幾月餘三月初一日聞鳩鳴有作

春雨濛濛來花時昏昏過山深多悲風閉戶祇欲卧此
村無杜鵑不知桑葉大灘聲自不惡賴此洗塵垢曉聞
晴鳩呼雲陰似將破故園何時歸麥飯出春磨

聞鳩有作喜為晴兆也是日開霽又喜其占之
有驗再賦之以貽達善季辨天色難保惟快作
詩為應耳

雨久成淫昏新晴如改過漸向東皋耕還思北窓卧昏
眼喜天晴觀書驚字大流泉無渥泥輕風不揚埃歸途

未須忙差穀聊避破小園遲能來早茶看落磨

十月初五日重賦菊

昔人十月菊已恨光景衰今茲十月菊瘦藥未覺遲兩
年無官歷弦望占盈虧人言閨在子節候固應違此物
秉堅正未怕風霜欺寧同此身槁不與清香離香性自
流傳更過梅花枝

贈馮法師

我昔登中山曾題翠微閣清詩照江月月落詩不落踏

金少日人言
卷一
露沐長松遼東一隻鶴千載還歸來塔杪棲寥廓過我
滄海東復作羽衣客問客何處來乃是巾山郭舊題雷
卷去恐我有新作贈之錦繡段歸哦耿林壑

初蟬

雨餘山氣涼高林發清樾黃鸝百轉罷初蟬始幽咽獨
簾曳長綠既續還又絕哀年歲時節坐久心寸折夢歸
伊川上樹深泉亂發倚杖聽多時殘陽滿雙闕

送陳用之遠遊

流水寫清音青山發令姿左右惟所取囊篋恒相隨君
遊且有日欲訪燕趙奇此行猶在眼已作久別思君如
生馬駒騰踏不可羈王良施轡勒往獻白玉墀胸中二
三策和扁為國醫南士方世用砭鍼貴適宜腰間黃金
印季子何必歸丈夫輕四海吾老不可期何以為君贈
梅花千里枝何以為我報千首紀行詩

失題

山雲如練靜水雲如鶴飛細觀聚散間動靜皆天機是

物本無心出處不可期我亦嘗出岫不雨竟空歸師今
恐雲去密密關窻扉收卷成坐卧補綴為衲衣此中有
深意宴坐添爐霏

效阮嗣宗一首

貧莫客千里富莫不出門迫隘多陵辱飄飄困風塵所
以丈夫志奮翼凌清氛一舉蹴四海載舉登崑崙玉皇
顧我笑衆嫫嫫以繁引酒酌北斗銀河為飛翻天姿固
如是齷齪何足云鄙哉貧賤者矯首望餘芬鵬鷃各有

分榆枋保終年

初九日夜月下聞蛙此物得水悅樂故鳴心事

與農人相關也

平田展明湖密林含宿霧整冠對明月天眼實汝顧那
敢醉諄號袒跣縱箕踞清心聽鳴蛙勝與俗子語青秧
插已齊決決溝底度憂樂在晴雨將非為私故斯言乃
知音旁人自不喻余茲適無事泯然離好惡坐久天西
傾汝鳴余睡去

金剛經疏
卷一
五月初四日浴閣成

罷農亦易足麥黃秧已綠早蟬發高林晚鶯隔修竹壺
觴休倦勛草閣一開浴脩然非吾故佳眠恣清熱

題蕭照畫卷

遠峯沒空蒼近樹森立壁叢篁鬱長汀茅茨露半菴歸
舟何處家中流弄長笛或恐畫師身留此黠淡跡

往時予有湖湘之游同年黃東發提舉以清江
楮衾贈別藏之四年矣山房夜寒覆之甚佳亂

後不知東發避地何處作此擬寄

我昔向湘潭故人貽我別珍於錦鯨贈未數緇袍脫溫
如陽春曦白似臘天雪香收禪榻雲光映書齋月政爾
獨眠佳毋使惡卧裂陰寒不內侵和氣無外泄自從離
亂來袍襖罄攘奪惟此寄僧房與書俱不減我本生蠹
魚自愛紙中穴宛如蠶作繭蛾吐眉眼出夜來初肅霜
子美衾如鐵忽憶此青氈覆我儉且潔中有布衾銘此
銘無冷熱

謝達善見惠碧桃古體

碧桃有佳實方春開白花悅悅花者實惠能詩家詠
花不詠實未解寫嘆嗟水蒼充朝佩天碧瀉露華空青
珍莫采帝珠淨無瑕水波遠涵竹霄影浮副瓜春山淨
梳掠秋烟澹籠遮卵色未有別膽形圖更加清酸笑金
橘寒脆壓銀茄瑤池漱靈液萼綠蒙翠紗一食潤燥吻
再食思無邪三食換仙骨四食凌飛霞回首謝玉塘吾
詩不妄誇

周梅所還譚山

柴門萬物靜秋色栖四山風簟自灑掃雲鳥相往還而有玄寂士冷然鳴轡環此客不喜飲舉瓢酌潺湲來既無所期去亦不可攀抱月入綠蘿枕石秋菲間

石臺紀遊

案此詩原本未載今據宋詩紀事補入

蒼山面長溪勢若飲奔馬層臺跨其脊萬古絕蕭灑登臨惟茲時朋從未云寡迨迨歷榛莽靡靡眺原野白雲與翠霞屢在履鳥下窮秋向搖落霜菊摘盈把賞心孰

與同幽抱欣已寫邈矣千載期名山俟來者

欽定四庫全書

閩風集卷二

宋 舒岳祥 撰

七言古詩

梅花石吟

梅花樹下梅花石花作玉痕石鐵色黃筌粉本花光枝
風吹數片尤奇特何年處士橫斜句影落寒溪印苔磧
又疑飛自羅浮來花僊謫墮投蒼壁或是天星下隕時
打著梅梢滅不得若非曾支織女機機上花紋相照射

定是荆和泣玉時淚入璞間餘點滴不然越女昔浣紗
指痕印粉難揩拭荒唐詭幻不可窮我自稽經探根極
傳巖人去實和羹花落空巖餘此迹花開花落幾春風
棄捐牆角真堪惜携向簷前洗濯看相對無言三太息

蠟梅詠

己卯
正月

蜜蜂數日不出衙將謂凍蟄無生涯今朝起看後園樹
總將蜜蠟銜為花香作蜜香色蠟色花瓣分明是蜂翼
不是案頭乾死螢不是營營蠅止棘朝陽熠熠泛崇光

黃露溶溶蜜滿房
柔梢不入嬋娟鬢
道韻偏宜冷淡裝
與梅同時喚作梅
風味甚似枝葩非
若將形色定品格
何得江珧比荔枝

自壽

閨風老人五十九
白頭饑凍荒山走
偶然脫命得生還
閨里相看驚老醜
今朝初度最可憐
五子三孫在眼前
老妻欲作無麪餅
問訊雞孃渠未肯
海水潮小未登魚
霜後黃柑亦自踈
窮人作事天不與
只有紅梅相媚嫵

為渠一笑買村醪老夫自歌稚子舞明年六十更可歌
大亂不死奈我何

十二月十七日歸故園酌紅梅花下

十六日
立春

今年剩有冬一月今冬先得半月春留春借冬皆樂事
但苦世上無閒人平臯梅花如雪浪夜色晨光迷澗漾
就中紅香清且妍風流故在海棠上昨夜月明天不寒
夢中走馬來花前舊時都下千金買翻棄草莽不值錢
性情貴遠每厭近久不見之端可憐今朝起揀白髭鬚

未能免俗為花娛小車駸駸溪石滑一竿掛酒懸長魚
無人對飲花為伴小奴亦解吹長管花應憐我老而狂
起舞踏影月凌亂老人更醉三十年不為酒僊即花僊
平臯木芙蓉千株爛然雲錦醉行其中如遊芙
蓉城也作歌紀之

牡丹一名木芍藥拒霜也號木芙蓉好花名盡多重疊
不取枝同取貌同悲鴻一聲天雨血落霞萬頃江飲虹
水花已盡岸花出千朵萬朵能白紅曾共鴛鴦登繡縵

也隨鷗鷺上屏風金釵欲插嫌花重玉手高攀與面重
弄色合歡無限思九心千葉為誰容朝看花開紅偏淡
暮見花斂紅轉濃朝開夕斂如趨市明日風光移別蕊
平生愛花入骨髓白頭出沒與花似老我逢花六十秋
花開花落水悠悠未喫太平一杯酒歲歲花開伴白頭

老融墨戲詞

寒木蕭蕭寒汀渺渺船尾插竿童子閒船頭推篷天欲
曉鴈鴈斜飛起哀草頗記江湖獨宿時一夢十年看未

了

贈楊佳孫

作詩意得在句先下筆直寫意所到世間惟俗最難醫
剖石得玉加精巧初如面壁無所睹一點圓明通萬竅
楊生楊生聽我言老語諄諄母乃耄生平十九未可量
淘洗晶瑩方入妙一再三見志愈堅嘉子至意為傾倒
七月十一日曉聞鶯有感

秋曉秋鶯鳴綠樹我自徘徊不能去年年鳴值晚春時

曉窗共聽人何處鶯鶯少駐聽我吟我吟未成淚雙注
來年啼上蠶頭山為說老人題此句

題潘少白詩

海鷗既過天沈寥瓦檠弄焰靜自搖特山陰橐適在案
讀罷不知山月高早從唐體入圓安更向派家事掀簸
盡囊六卷要我刪子自得之何必我燕騎紛紛塵暗天
少陵詩史在眼前我才衰退空茫然君能於此更著力
唐體派家俱可捐

牡丹

序

三月二十一日歸故園看牡丹草莽中才作
數花似訴主人不顧省渠也余亦對之惻然
東風常帶三分冷春日自有一種香百花合和不可揀
中人如酒令人狂馬塍賣花只貪早野翁自愛開遲好
看花不可見花心爛熳開時春已老梢頭蠶栗幻梓杆
有許包藏費天巧自携尊酒醉花陰偃仰鹿皮聽語少

余家舊藏畫作長松臨水波浪渺然淵明曳杖游其下
四子從之各奉杯盤壺觴以進其一子數鹿皮於地上

以待公
卧也

近作對江牡丹吟七章呈正仲正仲於拙吟無
不亟和者獨此七章未和携而歸芟湖半月矣
遞筒未至歌以趣之

邵子花開二十四吟詩驚動洛諸公我家兩株三十枝
歡喜亦與邵子同作詩七絕惱正仲過旬不見回郵筒
正仲材高氣浩博鄙我瑣細無豪雄文叔今見小敵怯
八駿豈肯盤蟻封再三思索得其意笑我不知時節異

洛陽城中天地中春色花光好天氣此時高韻一兩篇
流出胷中真樂事我生初見錢塘春歌舞西湖早已顰
如今不見湖山面鳥歌似哭花為塵作詩告人誰為聽
當哀而樂非天真我謝正仲此意厚請不吟詩但飲酒

次韻和正仲碧蓮花

此以形色指名耳訪之花
工謂此即蘘荷未審其的

好翁和了碧桃詠并欲盡賦園中花思遲才退句未吐
高篇已捷老栢塗此花蔓生枝自勁天水碧染雪藕紗
振鷺蟬聯蒼玉佩不比掘閤紛衣麻山阿幽人貞且吉

城隅靜女澹以華偶然種之近蒼栢君比兔絲疑未嘉
兔絲無根空托附結子濫充方藥家小兒欲以凌霄擬
一種麤俗堪歎嗟碧蓮比擬最清切好向天苑凌青霞

分龍吟

五月二十分龍雨今日霏微如下土前日何日何霖靈
正是分龍乃如許有餘不足相乘除天道人事元非踈
何龍分得此鄉雨問龍先日何處居我昔遊三江五湖
江湖處處皆龍渚我老歸農卧海曲與龍為隣無猜虞

一盂飽飯龍所與一片閒雲龍所噓百年地主屬老夫
龍來龍去識我無神龍飲食與人異布席欲薦寒泉蔬
我知雨從龍身落有時雨過墮蝦魚昔年海上親眼見
龍出滄溟騰碧虛蜿蜒百丈露爪尾黑水精靈光徹軀
龍兮只在人頭上人語龍誰語乎我有一寸愚願龍
聽區區一村南北異時雨天公用意何偏枯願龍溥澤
均八極東海蒼生誠可吁

歸至相見嶺喜見紫海

相見嶺頭相見少北風吹却南翁倒短日荒荒白草枯
顛狂亂葉如飛鳥前峯低處紫海出知是吾歸里中道
父兄問訊今何如只是相公言語好

潘少白前歲惠予零陵石一片方不及尺而文理
巧秀有山水煙雲之狀予以作硯屏始成因
賦長吟以遺之庚辰二月十八日

白雲際天隅峯峯爭秀出浩浩水石灘歸鳥時滅沒我
欲茅三間巢此重疊峰我欲舟一葉釣此蒼茫中君從

何處得此石千巖萬壑在方尺李成范寬格深秀關仝
荆浩骨峭特殆非一人之所能欲窮其源不可得君言
此物出零陵遠近來去皆天成是中能著元次山刻詩
勒頌留孱顏後來柳子曾作守銘記摹寫無遺閑二子
去後精魄在文章散落水石間鬼神往往竊餘巧戲弄
筆墨留斑斑贈我以作書硯屏林風石月秋泠泠蕭齋
靜對如有聆元子柳子突出也大奇今日之事我為之

樂神曲

汙田稻子輸官糧高田豆角初上場楓林沉沉誰打鼓
農家報本兼祈禳打鼓打鼓急打鼓大巫邀神小巫舞
絳衫繡帔朱冠裳手持鈴劍道神語前年軍過雞柵空
今年一母生十雄東種秫穫頗厚大甑炊糗甕成酒
家機白布濶且長翁媪製作新衣裳再拜奠神重酌酒
男耕女桑十倍強大婦小婦別有祝生養好男房計足
巫公巫公告爾神產穀不如多產銀驢載馬馱車碌碌
免斫拓條行簍扑

退之謂以鳥鳴春往往鳥以夏鳴耳古人麥黃
韻鸛庚之句乃真知時山齋靜聽嘲哢羣萃有
麥熟之鳴戲集鳥名而賦之

麥熟即快活汝不食麥空饒舌前時斗粟銀百星

錢楮不用

民間一切用銀薄如紙而碎如金

老農無銀色菜青此鳥年年啄草子

今年草根救人死鳥無所食饑奈何見人食麥喜且歌

催人鍛磨尤慙慙

其音若云黃鍛銀磨

前身恐是老農身大麥炊

糴先祭祖小麥作餅賽田神姊捉麥姊捉麥

竹雞音也昔人云泥

滑姊姊相隨筐有獲田間滯穠縱復橫偃僂東阡與西
陌婆餅焦斷消息而今麥熟婆當還莫憂餅焦兒不食
脫布袴村村雨滿田無路平生不慣著新衣兩腿泥深
逐牛步脫破袍與郎裁衫兩髀高田頭赫日曬額焦脫
衣掛樹踏桔槔畫眉叫畫眉叫抹截梳衰趁炊早夫婦
如賓有古風烏頭白頰宜相好上堂問訊白頭翁蚤晚
寒溫候不同善事阿姑姑不惡麤茶淡飯是家風提葫
蘆沽美酒布帘書字隣家有沽來行饁望田頭先酌甕

甌奉姑舅不學前村百舌兒說非說是搖花柳不學桑
間鳩婦相勑礪天陰逐去晴歸來大婦偷我弗偷辨說
曲直令儂羞淺鋪薄遍煮莧汁二升麥餅鶻突流爺飢
飢奉親約已渠非訕誰倚闌干十二紅鮮鮮翠碧亂芳
叢燭燒花蠟夜嫌短詞斲錦囊尊不空此事有分求不
得不如歸去從耕農煮莧汁鶻突流爺飢飢三禽言也
樂天三月晦日聞鳥聲詩遣脫破

袍勞報煖催沽美酒敢辭貧則
脫破袍是一禽非脫布袴也

梅下洗盞酌台紅感舊

天台紅酒須銀杯清光妙色相發揮
斃髹玉石豈不雅
君第酌之應自知
我有銀杯何所宜
恕齋惠我前朝得
今朝把酒竟茫然
梅花萬里人南北

恕齋謝樞
密堂也

賦山菴梅花

庭前梅花八九樹長為春風導先路
他山消息未曾真
特與詩人映門戶
無情有性悟色空
將影和香作言語
吳酥入酒鬪輕明
是雪是花并月咀
折來燭下看橫斜
素屏淡墨無聲句

生日仲素惠羊酒作此奉謝

去年蝶軒饋羊酒主人憐我空無有座上六客皆解吟
一翁不吟開笑口今年病叟蚤還山烹雞魚鱉翁對媪
五男四婦六稚孫更有曾孫依乳姆往來兩載總遭荒
瓦瓶聊以挹酒漿山蔬滿盤白雪白野橘堆飢黃金黃
荒村得此已自足羣奴饑啄撐空腸忽聞崇谿有書至
袁詩陳賦兩輝煌一松正可枯蘖比五雛真與羣雞爭
來詩有一松舉家病瘡涉三月一日計減一斗糧留儲
五鳳雛之句

到此作素供問君何為特殺生
臙神見夢羊踏菜便呼茗
碗來袂襤君當戒屠我辟穀
輕身與蝶同飛揚

田公姥詞

田公布衣五尺長田姥角冠八寸強
平生布施不造殃教養兒孫耕與桑
田公姥生為農家夫與婦壽考百年
作田祖歲歲田頭管風雨春三秋九
享雞豚環玦神靈如對語田公姥
聽儂歌者儂舞使我倉有杭使我庾
有徐使我園有黍使我富牛羊千斯
牯兮百斯牯田公姥

儂肴芬芬兮儂酒滑滑官稅既輸兮公役不煩男不為人驅女不為傖婦讀書識字應門戶

次韻和李寔父焰火行

山樵夏斬樗櫟枝受盡日炙薰風吹天寒歲晚見功用
春透肝鬲連腰肢一室煖香勝樺燭破衲紉縫針線續
牀頭甕子新葛成翁媪分釐小筵席山家此樂無厭時
何須玉筍扶金卮我亦平生知此味今年此味奇更奇
山中低厂編錯薪不知山外飛氛塵一塵一窩桴拙老

雅均此時痛快出苦辛

虞美人草

有序

篆畦有花非草非木冬槁春生而夏花花粉
紅色穗如蓼葉如槐條如柳故老相傳云劉
允叔自江西携種歸散植至此俗以鬢邊嬌
名之梅所周道士謂此即虞美人草也因為
長歌以遺之

咸陽一火燒天紅重瞳將軍帝業空欲據彭城作盟主

漢王隨手定關中垓下楚歌聞太晚帳前驚起途已窮
當時楚士盡漢歸只有虞兮心不離悲歌泣下計何短
項王去後知屬誰世傳姬死橫中道怨魄悲魂化青草
年年搖曳舞春風枝似柳條花似蓼羅衣猶自作吳粧
也似美人顏色好有人傳曲入絲桐宛轉吳音泣帳中
試將此曲花前奏花能起舞腰肢弓但疑此事史無書
項王潰去姬何如只應歌罷王自走不為虞兮一回首
死耶禽耶兩不知流傳想像寄花枝人生變化那可料

蜀王曾化為子規楚王剽悍骨肉叛項伯私漢無親臣
范增怒去黥布反生死相隨一婦人呂雉前曾入楚軍
項羽還之亦有恩虞死不憐王土葬帝王豈為兒女仁
道人能識此花名老人為造花枝曲我歌此曲花當舞
更使今人淚相續

庵中有紅山茶一株自臘月開至二月半為藥
尚無數也蓋十霜十雪矣

山茶一株紅勝燭旋落旋開相陸續朱霞散射曉霏晴

熠熠林光映幽谷雪中見此朱砂杯道人無情還悅目
端正濃粧不逞妖處女頽然在幽獨有時脫蒂嚮蒼苔
不作他花飛片逐劒南樵叟設色時就掌調丹貴勻熟
花容肉色兩相宜肌理細膩端不俗畫猶如此況天生
謂花無韻評未足白茶雖白太清癯何惜深紅著深綠

憶筇竹杖詞

有序

謝敬齋昌元所惠出入與俱五年矣丙子避
地留致庵歸訪之已失所在

筇竹杖筇竹杖敬齋惠我侔璆璔萬里岷江下峽船大
竹一筒中貯兩四明直在海東頭我得一條長在掌蛟
龍已蛻脊骨金色如黃玉中心堅節圍五寸莖似筆重
如鐵石聲鏗然杖兮杖兮吾與爾曾入千巖萬壑裏虎
豹遠遁兮魑魅不逢走及狙公兮追及鹿子忽不見兮
誰從寧入水兮為龍或以撾馬兮其毀不逢日暮兮山
空篁竹鬼歎兮霧雨其濛

餞歲行

歲來沙上草頭迎歲去梅邊雪中送歲去年來不自由
我亦送迎何所用人情厭舊只懼新不道新來老却人
喜為兒孫添一歲可憐光景轉成塵送君此去信悠哉
不知明日肯重來宇宙無窮迷道路追隨不見上層臺
蕭蕭便恐逐風散茫茫尚想隨潮回歲去忽忽不復顧
我猶留此君何處非緣故歲去無情自是新年促君去
送故迎新一百年不迎不送無新故

守歲行

一年辛苦歲終成夜杵相聞曉甌香缸面浮蛆初滄滄
小槽壓作春簷鳴東隣麥磨連日響餅料已具羹牙長
磨刀霍霍割紅鮮銀鬣翻光趁湖上歲闌無事且招邀
隣曲披榛共來往為言今歲勝去年來歲應須更勝前
去年除夜各走險荒村千里無人煙今年山舍一爐火
妻子甥孫相對坐巷翁里媪在眼前共酌瓦盆行果旅
只憐舊歲去無還惜此須臾未去間多情一宿尚難別
況是相同一歲闌固知無計得留駐只怕眠中不知去

添燈續火甚慙懃起寫桃符覓詩句

浣紗婦

修竹柴門向山路晴日滿溪春欲暮浣紗少婦不知寒
兩脚如霜下灘去少年閑倚青梅樹

一蓑

蓬窗漏晚風蓑衣蓋秋雨蒲白早潮來小兒事扶櫓三
尺鯉魚飛上天漁翁醉卧不能舉

六月十四夜久雨新霽見月極佳坐觀萬堂中

收拾塵寬湛然不作久不見此趣因書之以寄

正仲

久雨新霽如發蒙嫩月出海來屋東開軒靜聽百蟲語
清光入沼翻簾櫳白日勞勞生萬事不如淡月含冥濛
收心展體且高枕合眼不管東方紅我緣居貧得清省
晏起一粥黃昏鐘更深一頓白湯餅坐送落月沉西峰
眼昏燈下不看字與書相忘如不逢漸收少年辟穀效
養取眼力成方瞳自行此法頗簡易有能修之神氣充

臨役多憂劉正仲少忍一月毋忽忽

正仲次韻謝證明亦翁之作此意佳甚不次韻
為報

人言乍見易得好以我觀君久更佳古來善友晏平仲
顧沮孔子胡為哉不如寒拾兩相遇撫掌吃吃笑口開
雖然是中有機事笑人惡念自墮邪不如見惡亦弗笑
惻然憫悟自嘆嗟醉翁四十早自號君年五十銜始題
好翁地位君須到除拜甚稱何歎懷他銜叙爵此叙齒

稱位不以官高低他年同入隱逸傳何須羊馬卧青苔
題余文叔山間四時之樓

輕財好事余文叔磊落襟期端不俗外方避地客來多
我亦從君借書屋屋前曲徑繞淪漪池上高樓新結束
一條碧澗貫虹飛幾片青霞排闥宿四時自換景自留
是中雲月無春秋家家見山長在眼處處有山堪起樓
不如此樓能著我磨墨題詩樓上頭主人之賢樂復樂
青山曾見此客不

楊白花

案此詩原本未收今據宋詩紀事及宋藝圃集補入

楊白花懊惱隨風渡江水將心莫託少年郎少年一去輕
萬里楊條挿地便生根花性颺揚似夢塵恨不築城高萬
丈花飛莫放出重門珠簾繡柱香雲護祇有黃鶯知去路
騎牛歌題厲歸真騎牛圖

人騎馬我騎牛騎馬行大道青絲為轡金絡頭胡衣北
笠見者走揚鞭指顧矜朋儔騎牛入山谷不羈不勒無
拘束我只騎牛犢自隨母子相呼煙草綠騎馬不若騎

牛安牛自肥芻馬傷穀我見騎馬郎白金入手遭鞭朴
何如騎牛兒樹下高眠無寵辱

烏鹽角行

山中一種烏鹽樹剥皮為角開春路牧童把去上牛吹
煙草茫茫沒遠陂一聲兩聲兮桑青柘綠三聲四聲兮
麥綻秧肥山花如火遮眉目吹此田家太平曲三年不
聽此曲聲捲却地皮人痛哭

碧桃

碧桃本是僊人花
僊人花裏飯胡麻
初來此樹向誰得
翠眉嬋娟萼綠華
世間俗桃千百數
溪谷往往蒸成霞
紛紛見此欲羞死
亂紅吹落污憲紗
陳宮露唾天水碧
粉黛欲學爭咨嗟
豈知僊妃作狡獪
接花染汁便爾嘉
瑤池蟠桃即此種
花飛不肯污泥沙
實成唯許方朔喫
時時還戲王母家

山甫畫松

山甫作古松意造無定本
枝枝藏太陰筆筆涵混沌氣

吞千尺崖猶作飛瀑滾肺肝生洞壑槎枒出隱嶙奮臂
盤礴餘墨漬筆不吮若人蓋天機豈為尋丈窘胸中有
礪砢欲出不可忍恐是城南樹寫形難自隱嗚呼夾山
自有真松圖朝夕左右陳座隅伐薪架屋聽笙竽好翁
之計誠非踈

曉霜成花日色淒淡炙背南簷記所聞見

十月二十有二日霜淞成花泥渥渥黑旗一點飛過村
居民縮頭那敢出又聞鄞騎入連山搜捕鄉兵火廬室

台明隔嶺易張皇紛紛徙家藏穀實須臾又報兵首擒
向來安民今未畢老夫開戶望前山且炙南簷半窻日

出入二嶺行

出童公入童公一嶺二水分西東前山萬竹入新路新
路蒼海通方蓬入黃甘出黃甘一山二水分北南北南
百谷會江海鎮亭下注南山潭問君何事經二嶺辟
寇辟兵探絕境青山兩路雙闕開桑柘人煙在深井迢
迢橫過澄溪頭水風激激流人影籃輿落日黃泥坂短

策東風日將晚深竹人家少隣並麥苗翠被鋪平田忍
饑猶自念民饑餅餌風來一飽寬況今聖算窮幽遐檢
括丁口究阡陌或說更戍起南氓或議關防驅北客中
原隴土少人耕何惜就寬因去窄自古先王訂版圖兵
農合一如常式嗚呼先王為民定軍例後王為軍定民
籍嗚呼老儒臨風三歎息為國何如惜民力

春雪

去年臘雪已四白五白六白農夫愁麥苗凍熟鋤不得

菜心僵死何時抽
常年梅花已爛漫
今者乾沒如拘囚
枯枝尚赭紅
豆綠細蘂初作蒼
蠅頭紛紛黃雀狡於鼠
窮閭有粟爭呼取
老鳶自作攫肉謀
空屋狐狸夜相聚
嗚呼狐狸有屋爾得居室
中居人今在無
或言白骨如白雪
雪亦有仁遮白骨

綠萼香梅十樹咸
淳間自內園買歸
亂後尚存
對之感歎

縞衣黃裏綠雲跼
僊家結束來天隅
承平故態今尚爾

流落空山成歎吁莫對此被渠惱惜花情重人先老多
少當時似玉人埋沒沙場隨塞草杳杳宮車去不回上
林雁過無書到內園今更不堪看蝶廢蜂休日夜昏玉
砌無人寒兔入觚稜棲草野鷗蹲黍離麥秀今如此豈
為梅花故斷魂

詵十二弟以冬菊盆為余壽此花品金色而中
心作葱管突起正如金荔子乃作雪中英一首
謝之

弟以冬菊為兄壽臨風多情為三嗅煌煌金碗覆金柈
蕊管玲瓏明艷透重陽曾見金佛頭頂似旋螺踴泡漚
別有一種金荔子心中簇簇高堆起此時衆菊爭紛敷
二品於中亦自殊况此千林骨立後何從得此金覆盃
從來菊號霜下傑今當喚作雪中英雪中松栢不若汝
剛貞孔云後凋特晚耳冬嶺落毛釵亂橫水仙山礬何
足道此花便是梅花兄

桂臺

神龍不知身變化猶認潛鱗為故我先生曾出雨八紘
浪靜波恬歸海卧先生兩處領桂臺夢寐一生遊學舍
阿宜移扁就山牕鐵畫銀鈎金鈕鐫綠陰閉戶不知春
長日觀書誰覺夏天上吹香遍遠山月中散影流清夜
先生見扁如坐齋隨行不用木上座攀枝踏影弄猿鶴
萬事不到桂叢下天下清芬是此花世間最俗惟檀麝
後車還許樂天陪吟筆更須侯喜把幾人名遂不知幾
一日倉皇方淚墮人知德祐不出高豈識咸淳歸計果

平生一瓣桂臺香
口誦翁詩幾百過
舊臺何在桂凋零
日暮哀禽自相和
今臺喜見桂婆娑
往來不礙江鷗社
舊臺不見見今臺
依舊風流壓江左
他年人訪桂臺游
舊名更復因今播
月中桂樹最久長
此樹還如月輪大

十二月初一日醉歌

常年此日正月吉
今年經閏臘月一
歲闌喜展一月期
勝似戈揮魯陽日
搔頭偶見鶩陳橫
曝背閑看蜂衙出
一冬妍暖三月晴
薄雪微雨麥壠青
平臯十畝耰溉畢

明年擬取甌石羸歸耕還有新權柄向時樵長今里正
弟姪推尊不敢辭斗酒隻雞先自慶牧猪釀秫待誅求
賣田買鈔博性命北人自好南人惡人事紛紛天未定
君不見唐任濤宋魏閑因詩放後逢寬令

九日敏求與姪璋九萬載酒蓀墅邀予與胡山
甫潘少白及華頂周服之道士周若晦作客欲
摘藥浮杯叢委草間未有消息憫然賦之

五柳先生貧欠酒不說無花過重九杜陵野客酒可賒

只恨青蕊成蹉跎如今風物尤悽惻繞叢覓蕊無消息
寒蟬相弔野水流病蝶來偎寒日夕不見金錢將翠羽
惟有悲風吹蔓棘古人愛汝非無意志士仁人例憔悴
楚國無人屈子傷陶杜淒涼唐晉季此日何日悲更悲
聊嗅青枝記一時往時好事環轍迹建業錢塘華盡識
就中內本碧玉杯欲買黃金惜不得兩都風景今何如
淚墮叢邊和露滴

孤雁

十一月初
九日賦

憂心悄悄睡未能開門看月一片冰竅木相磨作鬼語
凍星入牖如螢青孤雁哀號向何處老夫掩耳不欲聽
爾從沙場經萬里昔時繫書達天子如今若向上林過
縱有書來誰取視陰山豁處狹如門結陣來時各有羣
辛苦避鷹兼避弋前行半度後行分秋水江南無所畏
老旅沉米蘆搖穗鷗鳬善熟少驚猜飲啄不爭遊且戲
不知何事背羣飛欲宿無依去無疑天長路杳翅流血
夜向霜淒聲轉微自倚能飛無與敵豈知天勢有違機

作書好報前征侶
看取悲鳴落羽時

罪言

匪兇匪虎吾道非鸛之侯不歸山南山北靡有定
壤東壤西生計微頽牆宿莽露泥泥荒野菊秋菲菲
我止安息我行安之噫吁嘻過殷墟兮麥漸漸覽周原
兮黍離離黍麥之秀黍麥之有無麥無禾不耕胡取白
骨兮成磻膏肉兮成泥已焉哉想自古之如彼匪斯今
之可哀死莫懲於既往生胡保其將來東溟之濱相奪

相攘殺人填海浩浩不盈輪迴報復此死彼生天假手
於王師使盡殪於秦坑痛臨淵而一弔悲萬古之茫茫
雜言

瑣兮尾兮胡中露鸚之鵒之在乾侯朝吟九歎復五噫
暮賡七歌并四愁白日曠曠中林幽幽瑾塞兩版蒙茸
一裘屋漏煤墮糜攪粕浮美人不來兮歲暮誰謂霰雪
漉漉落葉如雨

杜鵑花

杜陵野老拜杜鵑念渠蜀王身所變我今流涕杜鵑花
為是此禽流血濺嗟哉杜宇何其愚萬事成敗皆斯須
一枰黑白翻覆手揖讓放弑皆丘墟汝初一身今百億
凝滯結戀胡為乎爾生不能存社稷死怨謝豹何區區
至今有子不自保寄巢生育非良圖百億禽分百億花
數若恒河沙復沙此花開時此鳥至青楓苦竹為其家
錦官玉壘不可念翠華黃屋天之涯

俚語云謝豹勸杜宇遜位于其相開

明故怨之今杜鵑若呼謝豹云

不聞十月杜鵑鳥只見十月杜鵑花何

必看花與聽鳥老夫日日自思家

解梅嘲

昨夜鵲聲婉嬾斗覺春隨呼喚轉今朝檢歷知立春
屋角梅花笑初顰向人帶笑復含嗔嗔我今為異代民
我語梅花勿嗔笑四海已非唐日照爾花也是易姓花
憔悴荒園守空嶠閨風自是可憐人六十年来逢立春
安危治亂幾番見到此三年哭斷魂我是先朝前進士
賤無職守不得死難學夷齊餓首陽聊效陶潛書甲子

星回世換市朝新
頭白空山與鬼鄰
更有橫金拖紫客
臨危不死穩藏身

年根雨雪行

霧雨弊弊生窮歲
雞寒入屋犬竇吠
老衾破絮少溫存
濕薪吐汁無氣勢
一冬已近四月晴
殘歲垂垂點滴聲
人心無底難為德
一日不作將不食
年頭未有五日糧
井花水滿人閉倉

